

# 衢州文獻集成

〔史部〕

第  
66  
冊

# 衢州文獻集成

黃靈庚 諸葛慧艷

主編

〔史部〕

第  
66  
冊

國家圖書館出版社

(清)汪浩修

(清)宋俊等纂

「康熙」江山縣志十四卷  
(卷四至十一)

清康熙五十二年(1713)刻本

# 第六冊目錄

〔康熙〕江山縣志十四卷（卷四至十一）

（清）汪浩修（清）宋俊等纂  
清康熙五十二年（1713）刻本

.....

江山縣志卷之四

學校

國家化民成俗必由學校董之以師儒申之以功  
令而又

宸濤屢頒意至諄悉近復表章理學升朱子爲先賢  
尊聖崇儒爲千古所未有之事司其職者宜何如  
惕厲焉志學校

凡目

祀典

學規

附儒學

飲射

名宦

鄉賢

師儒

列傳

祀典

自辟雍以逮泮宮春秋釋奠歲費金錢鉅萬計崇德報功之典何其隆耶至

昭代而

聖主當陽益有曼絕乎千百世之上者因取歷代之制而備考之併紀先賢先儒之姓氏爵里於左

正殿

至聖先師孔子

木主

魯哀公始稱尼父漢平帝稱宣尼公和帝稱褒尊侯北魏孝文帝稱文聖宣父後周宣帝封鄒國公

隋文帝稱宣師尼父唐高祖贈太師明皇謚文宣王宋真宗熈元聖又改至聖元武宗號大成至聖文宣王明嘉靖九年更號曰至聖先師孔子

### 國朝因之

### 原始

先師孔氏名丘字仲尼魯人其先宋人世爲公族有防叔者避華氏亂奔魯居陬邑昌平鄉防叔生伯夏伯夏生叔梁紇紇卽啓聖公也娶顏氏女名徵在以周靈王二十一年十月庚子生孔子時魯襄公二十二年也考之夏正甲子則八月二十有七日三歲啓

聖歿童時以俎豆戲長爲委吏又爲乘田吏昭公時  
適齊爲高昭子家臣通于景公公欲封以尼谿田爲  
晏嬰阻遂反魯定公立季氏專政孔子不仕退修詩  
書禮樂九年爲中都宰年五十有一矣遂爲司空又  
爲大司寇十年相定公會夾谷卻萊兵反齊侵地十  
一年墮三都十四年攝行相事誅少正卯魯大治逮  
季桓子受女樂郊不致燔肉孔子去魯適衛又適陳  
畏於匡還衛主蘧伯玉家旋過宋適陳主司城貞子  
家居三歲反于衛晉佛肸以中牟畔召孔子欲往不

果將西見趙簡子至河而返靈公問陳不對復如陳  
又如蔡及葉楚昭王將封以書社地子西不可乃止  
又反乎衛哀公十一年冉有爲季氏將與齊戰有功  
乃召孔子歸是時孔子年六十有八度魯終不能用  
乃叙書刪詩正樂序易彖繫象說卦文言因魯史作  
春秋十四年獲麟十六年四月巳丑卒年七十二葬  
魯城北泗上

聖表

祖庭廣先聖四十九表采于裴弘之所談姑布子卿

之所稱老萊弟子之所識與荀卿司馬遷輩之所述者蓋云備矣然緯書所載謂胸應矩舌理七重及鈎文在手等處又弗及焉是足以盡聖人之儀觀歟漢文翁圖先聖遺像今不復見而天下學宮石刻唐吳道子筆鬚髯甚盛質諸前所云又未嘗及鬚髯也黃輦伯答何子容書曰攷元儒黃四如先生記孔聖遺像惟宗廟小影爲真孔叢子子思告齊君亦云先君生無鬚眉而天下侯王不以此損其敬後世偶塑轉異美髯長鬚未審何據太史公所謂鈞之未睹容貌

者也今闕里有行教圖是小影他如凭几乘輅及司  
寇等像亦盡鬚髯殆亦踵世本傳誤之故歟

### 祀典考畧

孔子祀典自漢至元代有隆焉素王以下皆袞冕矣

明洪武十五年命宋訥撰勅撤南京大學及天下郡

縣學像

嘉靖時張孚敬之議本此

更定釋奠禮樂成祖八年詔改

正章服孝宗用大牢加幣至世宗九年十月用輔臣

議釐正祀典詔去王號及文宣之謚而稱至聖先師

孔子廟不宜稱殿主用木朱書金字尺寸有定式其

配享從祀則唐貞觀以顏子爲先師又以左丘明以下至賈逵等二十二人爲先師而七十子不與元宗始以論語所載四科弟子爲十哲顏子封公餘封侯准禮授坐不立之文爲坐像曾參特塑像于十哲之次列閔子騫等七十七人于二十二人之上俱封伯爵姓名與史記同後升顏子于配坐閔子騫等爲十哲進曾參居子夏之位宋真宗時十哲封公會參而下封侯左丘明而下封伯徽宗時以孔鯉子思及公夏首等史記所載者十人俱封侯從祀又封王安石

爲王配享位在鄒國公之次後以楊時力請去之景  
定初以顏曾思孟爲四侑元因之明永樂二十八年  
黜楊雄進董仲舒正統二年進胡安國蔡沉八年進  
吳澄弘治九年進楊時俱從祀各有封爵嘉靖辛卯  
亦皆易肖像以木主去封爵稱先賢先儒某子增后  
蒼王通歐陽修胡瑗陸九淵五人黜申黨公伯寮秦  
冉顏何荀况戴聖劉向賈逵馬融何休王肅王弼杜  
預吳澄十三人以林放蘧瑗鄭衆盧植鄭元服虔范  
甯七人各祀于其鄉別建祠以祀啓聖孔子以顏子

父無繇曾子父點子思父鯉孟子父孟孫激配先儒

程珦朱松蔡元定從祀萬曆二年入周輔成

四配

四子配享自宋元豐咸淳始坐廟殿兩楹間俱木主

復聖顏子

名回字子淵魯人

宗聖曾子

名參字子輿魯人

述聖子思子

名伋孔子子鯉之子

亞聖孟子

名軻字子輿漢書作子車鄒人

十哲

十哲升配自唐開元間始坐廟殿兩壁間俱木主康熙五十一年以朱子升祔為十

主一

閔子騫

魯人

冉伯牛

魯人

冉仲弓

魯人

宰子我

魯人

端木子貢

衛人

冉子有

魯人

仲子路

名由一字季路卞人

言子游

吳人

卜子夏

衛人

顓孫子張 名師陽城人

朱元晦 名熹新安人

兩廡 兩廡從祀自唐開元間始也今因明嘉靖間祀典所定圖于左

東廡先賢 俱木主

澹臺滅明 字子羽武城人

原憲 字子思檀弓作仲憲宋人

南宮适 史記作南宮括家語作南韜字子容魯人

商瞿 字子木魯人

漆雕開 家語字子若蔡人史記字子開魯人